



## SAOPĆENJE ZA JAVNOST

26. avgust 2021.

### **Presuda za korupciju Ćazimu Salihoviću Osuđen za primanje dara ili drugih oblika koristi**

Tužilaštvo Brčko distrikta BiH dokazalo je krivicu Ćazima Salihovića (55), člana vladine komisije za stambeno zbrinjavanje Roma, optuženog da je nakon dodjele stanova za socijalno stanovanje u naselju Novo Brčko od korisnika zahtijevao i primio novac. Salihović, koji je u nadležnoj komisiji gradonačelnika učestvovao kao predstavnik udruženja *Romi na djelu*, nepravosnažno je osuđen na šest mjeseci zatvora za krivično djelo primanja dara ili drugih oblika koristi.

On je pred Osnovnim sudom Brčko distrikta BiH optužen da je 2017. godine, nakon donošenja rang liste socijalno najugroženijih porodica za stambeno zbrinjavanje, od korisnika namjenski izgrađenih stanova u brčanskom naselju Novo Brčko zahtijevao novčanu protivuslugu. Tereti ga se da je, pronalazeći ih na njihovim adresama ili pozivajući ih na razgovor, od osam lica zatražio protivuslugu u vidu predaje novca u iznosima od pedeset, dvije stotine, pa do hiljadu KM, koji su mu u nekoliko slučajeva višekratno isplaćivani.

### [link na optužnicu](#)

Optužnicu za produženo krivično djelo Primanje dara ili drugih oblika koristi (iz člana 374 stav 3 Krivičnog zakona Brčko distrikta BiH) Tužilaštvo je dokazalo pred sudom u svih osam tačaka. Nakon održanog glavnog pretresa, optuženom je za ovo krivično djelo izrečena kazna zatvora od šest mjeseci, ali i mjera oduzimanja imovinske koristi u iznosu od 2 810,00 KM, koju je dužan uplatiti na račun distrikta Brčko. Jednako kao i Tužilaštvo, optuženi presudu može pobijati žalbom pred Apelacionim sudom Brčko distrikta BiH.

Dokazivanje i kažnjavanje krivičnih djela korupcije u lokalnim javnim službama i dalje je među najvećim prioritetima u radu Tužilaštva i Policije Brčko distrikta BiH.

